

JOANNIS OOSTERDYK SCHACHT, *Ar. 66 <sup>12</sup>*

HERM. FIL.

# ORATIO INAUGURALIS,


DE

ARCTO, QUO PHILOSOPHIA  
CUM OMNIBUS, PRAESERTIM  
MEDICIS, SCIENTIIS NECTI-  
TUR, VINCULO.

dicta publice  
IN TEMPLO ACADEMICO

A. D. V. NONAS MARTIAS. MDCCXXVIII.

Quum Ordinariam Philosophiae Professio-  
nem in Illustri Frisorum, quae Franequerae est,  
Academia solemniter auspicaretur.



FRANEQUERÆ,

Excudit GULIELMUS COULON, Illustr. Frisæ Ordd. atque  
Eorundem Academiæ Typograph. Ordin. MDCCXXVIII.

RECEIVED IN 1930-1931

CHANDLER

1930-1931

1930-1931

1930-1931

1930-1931

1930-1931

1930-1931

1930-1931

1930-1931

1930-1931

1930-1931

1930-1931

1930-1931

*PERILLUSTRIBUS. AC. NOBILISSIMIS.*  
*PRAEPOTENTIUM.*  
*FRISIAE. ORDINUM.*  
*DELEGATIS. NOVENVIRIS.*

E T.

*QUI. ILLIS. AB. ACTIS. EST.*  
*VIRO. GRAVISSIMO.*

N E C. N O N.

*PERILLUSTRIBUS. GENEROSIS. ET. AMPLISSIMIS.*

*CURANDAE.*  
*FRISIORUM. ACADEMIAE.*  
*QUATUORVIRIS.*

*AEQUIS. ARTIUM. ET. SCIENTIARUM.*  
*AESTIMATORIBUS. AC.*  
*STATORIBUS.*

*HANC. ORATIONEM. INAUGURALEM.*  
*EO. QUO. PAR. EST. ANIMI. CUL-*  
*TU. AC. DEVOTIONE.*

D. D. D.

*JOANNES. OOSTERDYK. SCHACHT.*





JOANNIS OOSTERDYK SCHACHT,

# ORATIO INAUGURALIS

D E

ARCTO, QUO PHILOSOPHIA  
CUM OMNIBUS, PRAESERTIM  
MEDICIS, SCIENTIIS NECTI-  
TUR, VINCULO.

---

*Illustrisimi ac Nobilissimi Academiae Frisicae  
Constituendae Quatuorviri, Maecenates Op-  
timi.*

*Magnifice Rector.*

*Quarumvis Artium ac Scientiarum Professo-  
res Celeberrimi, Collegae exoptatissimi.*

*Patriae Patres, Senatores, & quotquot avitis,  
A qui-*

## 2 JOANNIS OOSTERDYK SCHACHT

*quibus atria splendent, imaginibus, vel gestis  
in Republica muneribus conspicui adestis, Vi-  
ri Amplissimi.*

*Prudentissimi Civitatis hujus Magistratus.*

*Divinarum Ceremoniarum Antistites fidelissimi.*

*Quarumcunque artium ac disciplinarum Doctores  
Consultissimi, expertissimi, acutissimi.*

*Cujuslibet loci, ordinis, atque dignitatis Cives,  
Hospites humanissimi.*

*Tu denique lectissima Academicae Juventutis  
Concio, Patriae & Parentum Spes, Acade-  
miae Decus, noster dehinc Amor, nostrae  
Deliciae.*



Mnes omnino artes atque sci-  
entias, illas praesertim, quae  
ad humanitatem pertinent,  
communi vinculo inter se  
colligari, socioque & quasi sororio  
foedere conjungi, vetus est jam ab  
antiquissimis usque ducta temporibus  
opinio. Cujus quidem veritatem uti ex  
ipsarum natura & indole demonstrare  
esset

esset facillimum , ita vel inde satis superque constare arbitror , quod primi principesque in quolibet doctrinae genere viri non in sua , quam profitebantur , unice , sed & in reliquis disciplinis operam posuerint non perfunctoriam.

Verum enim vero , quemadmodum virtutes , ut sapientissimi ex Stoicis pulcre docebant , arcte inter se cohaerent omnes , at , me iudice , non aequae arcte singulae , ita inter ipsas quoque artes diversi dantur cognationis gradus. Sunt enim ; quarum societas cum reliquis , quaecunque demum illae sint , scientiis tantum non est inseparabilis : sunt vero , quae cum ceterarum plurimis strictè quidem adducto , at non individuo penitus , copulantur nexu. Quarum priores inter peculiari jure primas tenet nobilis Philosophia , sedula illa atque indefessa rerum cum materialium tum omnis corporeae molis exper-

A 2

tium

tium indagatrix; qua, si Tullio credimus, nullum bonum optabilius, nullum praestantius neque datum mortali generi, Deorum concessu & munere, neque dabitur. Adeo certe necessaria est Philosophiae cum reliquis disciplinis consortio, ut eam tanquam basin & immotum fundamentum, in quo innituntur omnes, imo ceu earundem matrem, e qua vitam ducunt atque originem, non inepte consideres. Habet vero eadem haec Philosophia commune quodpiam cum omnibus, sed non aequè firmum, quo nectitur, vinculum. Medicina scilicet, vitae illa sanitatisque custos & procuratrix, strenua dirorum morborum expultrix, adeo firmiter ei prae reliquis connexa incedit, ut sine Medicina Philosophia illibata servari nequeat, sine Philosophia vero Medicinae sua constare nequeat aut utilitas aut dignitas, Medicusque *αφιλόσοφος* non Medicus, id est,

ta-



talis, qui morbos morborumque causas in corpore latentes vera ratione detegere, detectas profligare, profligatas porro avertere novit, sed Empiricus & agyrta circumforaneus, sive, ut verbo dicam, hominum ineptissimus vocari mereatur.

Hanc ego materiam, A. A. H. H. hac horula, qua ex decreto Amplissimorum Academiae hujus Curatorum, bonis avibus, solemnī ritu ordinarium **PHILOSOPHIAE** docendae munus publico sermone auspicarer, accuratius excutere, & **DE ARCTO** tantae artis **CUM OMNIBUS, PRAESERTIM MEDICIS, SCIENTIIS** **VINCULO** fusius disputare in animum induxeram. Quod quidem argumenti genus, utile simul, nisi multum fallar, & jucundum, neque a me ipso neque ab officii ratione alienum esse facile agnoscitis. Is enim ego sum, quod praefiscine dixerim, qui jam in-

B

de

de a primis adolescentiae meae temporibus praestantissimas sacrae hujus scientiae dotes vere aestimare, justumque ipsi pretium ponere didici: Is ego sum, qui a teneris unguiculis, nescio quo, coeco dicam abreptus impetu, an, quod verius, adoranda Dei ductus providentia, dilectissimi mei Parentis Avique vestigia premere gestii, neque me in verum Medicum evadere posse, nisi simul nobilissimae Philosophiae sacris initiarer, fatis percepi.

At vero, dum ex recepto majorum more publice pro celeberrima hac concione, ad quam tot tantosque cum natalium splendore illustrissimos, tum rara profundae eruditionis laude maxime florescentes viros confluxisse video, dicere paro, ita me & animo & corpore percelli sentio, A. A. H. H. ut contremiscam totus, arrectaeque stent comae & vox faucibus haereat. Nec certe mirum! Si enim vel versatissimi  
in

in dicendi arte magistri commoveri  
solerent vehementius, ubi publice  
pronunciandi datam sibi cernerent  
provinciam; si mutus aliquando re-  
cesserit Demosthenes, creditisne, me  
omnibus omnino, quae in Oratore re-  
quiruntur, dotibus destitutum, ne-  
que vel tantilla politum exercitatione,  
sine gravissima animi perturbatione in  
cathedram hanc, e qua modo tantum  
virum tam ornate splendideque dicen-  
tem audivistis & mirati estis, escen-  
disse?

Quin imo publice fateri non eru-  
besco, quotiescunque ab una parte  
augustissimi hujus loci dignitatem; vi-  
rorum hic dicentium & docentium  
doctrinam, celebritatem, gravitatem-  
que confidero; ab altera vero curtam,  
cujus mihimet probe conscius sum,  
supellectilem; ingenii, quod sentio  
quam sit exiguum, tenuitatem; pau-  
ciores denique, quos numero, annos

intueor , fateri , inquam , non erubesco , parum abesse , quin succumbam totus & deficiam , ejusque me temporis poeniteat & consilii , quo oblatos ab Illustribus & Praepotentibus Ordinum Frisiae Delegatis Novemviris honores suscipere non dubitavi.

At quid haereo ? jacta est alea ! audendum est , A. A. praestatque longe pauca incomto sermone dicere , quam tacendo solemnem hunc , tantaeque festivitati unice sacratum diem subterfugere. Et certe , ut dicam quod res est , quam in vestra benevolentia repositam habeo , haud parum me erigit & confirmat spes , metumque , qui modo me terrebat adeo , ut balbutiens verba facerem , dicam an eructarem , si non omnino omnem , magnam saltem partem mihi adimi laetus persentisco. Vos enim eos agnosco , quos eandem , qua conjunctissimum collegam modo prosecuti estis , animi aequitatem

tem mihi quoque non denegaturose esse audacter, nec temere tamen, confido. Vos ii estis, a quibus haud difficulter veniam me impetraturum sperare ausim, si blandis exquisitissimorum verborum sententiarumque illecebris aures vestras atque animos delinire nequeam.

Adeste igitur aequis animis, auribusque favete & linguis!

Ut vero ratione ac via procedat Oratio mea, primum dicendum arbitror de arcto, quo cum omnibus generatim scientiis Philosophia cohaeret, nexu; quod ut liquidius constet, ple-  
rasque dein artes percurram breviter, ostensurus, nullam esse, quae non fidissimam cum eadem habeat cognationem; tandemque indissolubilem esse, quo Medicinae praeprimis adstricta est, nodum evincere conabor.

Nullus opinor est, qui dubitet, quin vere arctum dici mereatur vinculum,  
C quod

quod adeo valide scientias inter se confociat, ut, si laxato illo aut diffracto has disjunxeris, vel de robore & dignitate suâ plurimum amittere, vel omnino perire necesse sit: Sicuti enim summe necessariam, qualis causam inter & effectum datur reciproca, duarum rerum harmoniam inde merito colligis, quod, si ponas alteram, non possit, quin & altera ponatur, sin tollas, itidem tollatur, ita vel Mathematica veritate certius opinor, eo firmiorem esse earundem connexionem, quo ab isthac relatione abfuerint propius. E quibus nihil esse intima nec sine certo earum interitu violanda, qua Philosophia reliquaeque disciplinae tenentur, familiaritate conjunctius illicoprehendemus. Quid enim, obsecro? nonne primarius, ob quem ingenuae & liberales artes addiscuntur, finis sapientia est & eruditio? Consulite A. A. quotquot sacra pandunt mysteria, consu-

consulite Juris Legumque peritos, vi-  
 tae sanitatisque statores, ceterosque,  
 qui humanioribus literis impigri in-  
 cumbunt, omnes, nae uno ore con-  
 fitebuntur, in id se intentos esse, ut  
 docti, ut eruditi, ut sapientes audiant.  
 Quae cum ita sint, quis, quaeso, in-  
 ficias ire velit, illam artem, quae inde  
 a multis retro seculis, refragante nul-  
 lo, sapientiae studium amorque & di-  
 cta & credita fuit, quo scopus, quem  
 ceterae sibi proponunt scientiae, feriri  
 possit, summae esse necessitatis? neque  
 enim neglecto sapientiae studio ad ip-  
 sam pervenies sapientiam: Quo enim  
 illud frigidius fuerit, eo haec a te au-  
 fugiet longius, sin aestuaverit, ipsam  
 vel sponte citis ad te properantem pas-  
 sibus comprehendes facile. Eadem e-  
 nim hic est, si vulgato, sed apposito  
 tamen, uti licet exemplo, quae inter  
 merces nummosque intercedit, ratio;  
 si enim Pactoli opibus onusta fuerit

crumena, pretiosissima quaeque, quae  
 venum prostant, haud difficulter ac-  
 quires: At ridiculum te praeberes  
 & cachinnis merito explodendum, si  
 nec obolum, unde restim emas, ha-  
 bens splendidam tibi comparare supel-  
 lectilem magno, at irrito magnasque  
 nugas parituro, molimine desiderares.  
 Non minus mehercle ineptus eris, si  
 te sine ullo Philosophiae exercitio ip-  
 sius Sophiae compotem futurum tibi  
 persuadeas, cum nec illam repudiare  
 possis, nisi & huic divortium scribas,  
 neque in hujus amorem allici, nisi &  
 illam depereas. Quid? putemusne tan-  
 tum artis nostrae privilegium minus ve-  
 teribus perspectum fuisse, qui eam  
 non amorem, non studium, non ex-  
 ercitiū sapientiae sed ipsam sapien-  
 tiam, cultoresque ejus non sapientiae  
 studiosos, sed sapientes, magnifico sane  
 titulo, vocare soliti fuerunt olim; quo  
 certe, nisi illum PYTHAGORAS,  
 mul-



multa nos quidem scire at nescire plura, unumque Deum vere sapientem professus, immutasset, vel ad hunc usque diem dubio procul superbire ipsi licuisset.

Quis ergo non agnoscit summam Philosophiae cum reliquis disciplinis necessitudinem? quae longe patebit evidentius, si adeo amice eas inter se conspirare ostendero, ut vel primarum fundamenta absque illa jaci nequeant, neque, si vel forte jaci possent, ulli in his progressus, nisi illi adsidua navetur opera, fieri possint. Quis enim nescit, quam ab omnibus retro seculis cum a gentilium plurimum in primis a Christianis sapientibus, Sapientissimum Regum Salomonem ducem secutis, vere non minus quam pie creditum fuerit, omnis omnino sapientiae initium & quasi saxeum fundamentum esse timorem Dei, adorandi & summe perfecti numinis, quod

D

vera

vera & consummata est sapientia , e quo ceu inexhausto fonte omnem hauriendam esse scientiam , qui mentis suae scrinia vel leviter excutere , & impressam illi Divinitatis notionem contemplari non renuit , negaverit nullus. At vero , obsecro , quo pacto tantum numen debito timebis cultu , nisi tibi innotuerit ? Ut enim ignoti nulla cupido , ita neque ignoti timor cultusque ullus. Quo autem modo , quibus , quaeso , auxiliis in necessariam adeo tanti Dei devenies notitiam ? nisi Philosophia , cujus incredibilem utilitatem A. A. H. H. jam vel me tacente percipitis , viam monstraverit planam , facilemque ; Illa enim , praeterquam quod summi numinis existentiam argumentis demonstrat solidissimis , infinita quoque infiniti Dei attributa cum ex rationis lumine tum ex sapientissimis ejus operibus detegit , & tam evidenter patefacit , ut qui vel semel attento illa  
feda-

sedatoque perpendit animo, non possit,  
 quin divino velut percitus oestro totus  
 quantus in admirationem tanti creato-  
 ris abripiatur; atque ita ad honorem  
 timoremque aeterno rerum omnium  
 parenti praestandum incitetur, incen-  
 datur, inflammetur. Adeo A. A. ad  
 Deum venerandum, sanctaque animi  
 reverentia timendum facit Philosophia!  
 adeo firma primaque sapientiae jacet  
 fundamenta! adeo tutam ad ulterio-  
 res progressionem sternit viam! Vix du-  
 bito, A. A. H. H. neque adeo hebes  
 & obtusa est ingenii acies, quin  
 facile praevideam, argumentum hoc;  
 quod pro artis necessitate attuli, me  
 iudice, ponderosissimum perditissimo  
 hoc seculo, quod tot prohi dolor! A-  
 theorum est feracissimum; quod tam  
 innumeros fovet, qui falsa, dicam an  
 insulsa, scommata & dicteria in sacra  
 vibrare non verentur; qui quidquid  
 ferium est, si non publice poenae de-

decorisque metu coerciti , at privatim inter suos ludicro risu excipiunt ; facile , inquam , praevideo argumentum hoc , in quo haud parvum causae meae patrocinium situm esse lubens concefferim , a multis probatum minus , imo ceu futile & inane rejectum iri , qui id nobis favere parum , quin potius sententiam nostram funditus evertere clamitent , dum vel ipsa constat experientia , magnos multosque saepe existitisse viros , quibus Divini numinis sordebat cultus , qui tamen rara eruditionis laude multaque solidae sapientiae fama supra reliquos longe inclaruere . At ego obtrectatores hos cavillatoresque flocci facio , nihil hoc hominum genus curo , neque dignos censeo , quibus vel verbum reponam : fruantur illi suo , si lubet , genio ; valeant cum hoc opinionis portento ; quin & religionem nihil esse aliud nisi *μορμολυκεῖον* quoddam , merumque Politico-  
rum

rum figmentum, quo cives facilius tutiusque in officio contineant, si possint, sibi persuadere conentur. Nos certe, qui ad verae & incorruptae rationis lancem cuncta examinare; qui ex naturali omniumque animis impressa Theologia; qui ex fallere nesciis summi Dei oraculis unice sapere didicimus, nos certe eo dementiae, dicam an superbiae, pervenire cavebimus, ut neglecto, quem mortales immortali Deo offerre tenemur, honore, rite quidpiam succedere felicemque fortiri posse exitum nobis stulte imaginemur; sed vel ab ipsis Ethnicis vivendi leges mutuari non verebimur, qui, licet falsas de Deo foverint opiniones, non aliunde tamen nisi ab ipso Deo sapientiae principium petendum esse, pulcre animadverterunt, quod vel ex PYTHAGORA evidens est, qui discipulos suos ne minimum quidem nisi effusis ad superos precibus aggredi jubebat: Quid?.... Sed toedet

E

his

his refutandis diutius immorari, quorum animus horret meminisse, luctuque refugit.

Videtis itaque A. A. O. O. prima verae sapientiae, omniumque adeo, quae eo tendunt, artium initia e Philosophiae penu depromenda esse; quam vero nulli nisi hac duce & auspice progressus fieri possint, non difficulter vel coeco apparebit. Quid enim? Nonne omnes disciplinae, si quid in iis proficere desideremus, firma & solida nos jubent ponere principia, e quibus per firmas rigidasque conclusiones inconcussam veritatem eruere possimus? Hanc enim ad verum investigandum optimam, citius dixerim, unicam esse viam tam apertum existimo, ut apertius nihil. Quo pacto enim ego ex incertis dubiisque assumtis id, quod certum & omni exceptione majus est, elicere potero? Hoc uti sanae mentis homo ne vel somniaverit quidem, ita qui

qui forte deliret adeo Anticyras ablegandum & Helleboro purgandum communi suffragio totus censeret Philosophorum coetus: Aut quomodo e veris firmisque fundamentis, si in nectendis consequentiis aberravero, veritatem colligam? Id si fecero, alte illa in Democriti puteo recondita latebit, & latebit aeternum; neque ulla arte eam extrahere potero, nisi & immota ratiocinii posuero fundamenta, nec nisi indubitatas deduxero sequelas. Atqua, obsecro, ratione cum de principiorum certitudine, tum de justo argumentandi ordine persuasus ero? Nil, si quid video, desperandum; id enim docebit norma, ad quam si ipsa principia, si conclusiones exigere libuerit, facile eorum certitudinem incertitudinemve dijudicare, facile verum a falso discernere potero, quod quidem eo fiet facilius promptiusque, si talem in dies tractavero artem, quae ex nulli

mortalium negandis axiomatis veritates demonstrat, iisque certo demonstratis, nihil supponens, fingens nihil, unice utitur, quibus in novas ulterius inquirat. Huic enim viae si saepius institero, sophismata a veris ratiociniis, paralogismos a justis argumentis, dubiasque conclusiones ab indubitatis distinguere nulla opera addiscam. Si nomina harum artium, quarum tanta est cum omnibus disciplinis necessitudo, quaeritis, A. A. H. H. Philosophia audiunt & Mathesis. Philosophia certe ejusque haud infima pars Logica, non illa, quae Scholasticorum tricis, quisquiliis & ineptiis refertissima praeter ipso, at inani sine mente, sono tremenda pene nomina solidi continet nihil, sed quae veros conceptus formare, clara ab obscuris, distincta a confusis segregare docet, certum praeber monstratque criterium, ad quod si principia, si sequelas, si ratiocinii denique



nique momenta expenderis, haud difficulter certa ab incertis, firma & vera a probabilibus verisimilibusque dirimere licebit. Haec certe norma ceu cynosura erit, ad quam vela cursusque dirigere securus poteris. Haec ceu praelucens Pharos, quam si unice intrueberis, nullus naufragii metus, nullum instat periculum. Hanc vero in clara & distincta perceptione, & in ea quidem sola fundatam esse uti sana clamat Ratio, ita ejus antistites argumentis evincunt gravissimis. Haec certe clara, haec distincta perceptio vel unica est regula, quae nos de rei veritate reddit persuasissimos, vel, quod dicere periculosissimum puto, nulla est. Actum esse de omni cognitione, actum de primis notionibus, &, per quam in veritatis templum datur aditus, occlusa videtur janua, nisi haec, cujus dignitatem non possum non extollere, evidentia pro ipfissimo veri

F

cri-

criterio agnoscatur. Mathesis vero, quaeque principem ejus partem constituit Geometria, dum Marpesia caute firmioribus principiis innixas detegit veritates, ita animum pulcro huic ratiocinandi generi adsuefacit, ut, contracto repetitis actibus habitu, in reliquis etiam disciplinis felici cum successu hanc agendi methodum sequatur, nec sequatur modo, sed adeo sibi propriam reddat & familiarem, ut, quamprimum ab ea vel minimum quacunque de causa desciverit, subsistat, neque sine summo errandi periculo progredi se posse nec opinus fere percipiat. Possem equidem, & possem facile re ipsa demonstrare, quantos ad verum indagandum fructus ex Geometria, utut ab ineptis quibusdam ventosisque speculatoribus rejecta & contrita, ceperint omnes scientiae; & demonstrarem, nisi id inter veri nominis Eruditos constaret omnes.

nes. Quantam verò ex divina hac arte, quippe τῶν Θεῶν ἀπὸ γνῶσεως jam olim PLATO pronunciavit, utilitatem hauserit praeprimis Philosophia, nisi paucis enarrarem, parum certe ejus, quam profiteor, scientiae dignitati consulere viderer. Adeo enim Mathematicae cum Philosophicis colludunt disciplinis, ut nomine quidem tenus diversas, re tamen vera easdem esse & discrepare fere nihil, qui non plane in iis hospes est assentiatur facile. Quid, amabo, Philosophia, si a Matheſi ſeparaveris, cenſenda eſt? Sane nihil aliud, quam fictarum hypotheſium & luxuriantis cerebri figmentorum chaos. Quis enim de infinito aliqua cum veri ſpecie diſputabit? quis motus, quem ſi ignoraveris, ipſam naturam ignores neceſſe eſſe vere pronunciavit ὁ φιλοſοφός ARISTOTELLES, proprietates & effecta? quis pendulorum vibrationes? quis corporum tam mollium quam elatiſticorum percuſſio-

sionem? quis gravium descensum projectionemque? quis elasticitatis leges? quis Opticen, Dioptricen, Catoptricen? quis hydrostaticam? quis hydraulicam? quis miram soni lucisque naturam? quis, ut innumera taceam, stupendos corporum coelestium motus cursusque, quaeque inde fluunt mirae naturae phaenomena? quis, inquam, vel omnia haec, vel horum pleraque rite intelliget, nisi haud parvam in Mathematicis peritiam eamque reconditam longo usu atque exercitatione sibi comparaverit. Quam vellem A. A. H. H. per singula haec ire, & vel ad oculum ostendere, quantum post excultam majori opera inde inprimis ab Ill. NEWTONI temporibus Matheseos incrementi ceperit naturalis Philosophia; At non hora haec, quae sermوني limites figit, sed integer dies deficeret.

Ne vero novam hanc nec nisi Neoteri-

tericis calcatam esse Matheſi duce Philoſophandi viam cavillentur nonnulli, qui veteribus nimium mancipati quidquid novum eſt & vulgare minus expungi mallent atque eliminari: Tantum enim abeſt, ut inaudita haec ſit rerum cauſarumque naturalium inveſtigandarum ratio, ut potius ſplendido vetuſtatis titulo fulgeat, bonisque ſe commendet omnibus. Quis enim *φιλοſοφουτατος* ignorat PYTHAGORAM? qui, ſi quid in Geometricis novi inveniret, Muſis bovem immolaſſe dicitur, nec bovem tantum, ſed, ſi qua LAERTIO fides, hecatomben, cum in triangulo orthogonio hypothenuſae potentiam aequalem eſſe potentiis laterum demonſtraſſet. Quis nescit laudandum illud atque ab omnibus Philoſophiae antiſtitibus ſequendum PLATONIS, at quanti Philoſophi! inſtitutum, quo omnes Matheſeos rudes e ſcholis ſuis proſcribebat, dum praefixa iis haec verba,

G

ba,

ba , ἰδεὶς ἀγεωμέτερος ἐσὶτα , neminem admitti monebant , nisi qui necessario Geometriae subsidio instructus sacra haec illotis manibus tractare nefas ducebat ? Quis denique XENOCRATTI non applaudit , qui Geometriam unam ex Philosophiae ansis vere judicabat. ?

Sed ut e diverticulo in viam redeam , ex iis , quae huc usque differui , nisi me omnia fallant , evidenter , opinor , apparet , nullam omnino esse artem , nullam scientiam , quae Philosophiae tanquam firmæ basi non innitatur ; Quod quidem negotium ita confectum mihi persuadeo , ut plura , quae ad tantæ veritatis probationem multum faciunt , argumenta anxie conquirere , atque hinc illinc corradere minus utile videatur . Si vero ipsas disciplinas seorsum propius perlustrare , atque intentiores in iis oculos defigere volueritis A. A. H. H. nullus vestrum erit ,  
cui

cui non luce meridiana clarior argumenti nostri apparebit certitudo: Neque tamen omnes (opus enim hoc exigeret infinitum) sed eastantum, quae omnium consensu principes habentur, leviter attingemus. Quas inter mentis oculos miro splendore prima perstringit nobilissima, maxime necessaria, nullique non amanda, colenda, desideranda Theologia revelata, quae uti de rerum praestantissima agit, tantae quoque ipsa est dignitatis, ut reliquas disciplinas longo intervallo post se relinquat. Haec tamen ipsa Theologia adeo artis nostrae ceu certae comitis auxilio indiget, ut nisi a Philosophiae peritissimo rite intelligi iusteque explicari renuat. Nolim, censeatis, A. A. O. O. me omnia, quae pro summa harum disciplinarum atque suavissima conjunctione militant, argumenta allaturum, longaque verborum circuitione atque anfractu vobis

commendaturum esse ; Praeterquam enim quod vestra ineptus abuterer patientia , tanto undique illa confluunt numero , ut quod mihi principium , quis futurus esset finis plane nesciam. Sive enim primam, quam vocant, sive naturalem spectaveris Philosophiam , innumeras utraque, quae rem demonstrant , suppeditat rationes. Non igitur multus ero in enarrandis illis, quae revelata Theologia ceu indubitata supponit neque ex professo probat ullibi, quorumque demonstratio unice e nostra arte hauriri potest. Quis summi momenti veritatem, fatale illud Theologiae pignus , quo sublato tota ejus dignitas , utilitasque corruat necesse est , quis inquam divini numinis existentiam nisi Philosophiae ope adstruet? Atheosne ex revelatione convinci posse putes , nisi ex naturali lumine petita praemiseris argumenta ? Qua, obsecro, ratione validum iis, quae  
Sacra



Sacra sufficit Pagina , inesse pondus contendes , nisi hanc fallere nesciam , quippe quae Deum sui auctorem jactat , eviceris , adeoque dari Deum vel gratis adversus negantes assumseris , quod quam ineptum sit nemo non videt , vel aliunde firmissime ostenderis. Taceo maximos exstitisse olim & exstare hodie viros , qui divinam Sacrae Scripturae originem nonnisi ex ratione vindicandam acriter urgent. Quae quidem omnia accuratius evolverem , si jam actum agere & post Homerum Iliada conscribere vellem ; tam masculis enim ratiociniis Theologiae naturalis , quae quanto opere cum prima , ut ajunt , Philosophia conjuret vel tyrones norunt , in revelata necessitatem ratam dedit nobilissimum quondam hujus Academiae decus , acutissimus simul Philosophus & gravissimus Theologus H. A. ROELLIUS , ut restare videatur nihil.

H

Quo

Quo vero pacto, ut ad ea pergam, quae Physicam spectant, quispiam naturalis Philosophiae rudis plurima, quae in Jobi, Davidis, & Prophetarum monumentis, aliisque cum Veteris tum Novi Foederis voluminibus, occurrunt, loca intelligere & verum illorum sensum eruere atque auditoribus suis exponere poterit? Neque necesse cen-  
seo multis vos A. A. morari; infinita enim adduci possent exempla, e quibus vel coecus videat, in indagando Sacrae Scripturae scopo Theologum absque Optices aliarumque Physices partium non superficialia cognitione proficere posse nihil, quem tamen, si illa excoctus fuisset, felicissime detegere potuisset. Ne vero haec temere nimis protulisse videar, quis, quaeso, est, qui nescit, quanta industria, prudentia, & felicitate abstrusissimos & difficillimos plerosque Sacri codicis textus aperuerit, explanaverit, enoda-

daverit splendidissimum illud Hollandiae nuperumque Sidus, pius certe, si quis alius, Philosophus summusque Mathematicus B. NIEWENTYTIUS. Accedit, quod divinam ejus auctoritatem adversus impios obtrectatores, qui nunquam non veracitatem argutulis scilicet sophismatis funditus prohdolor! evertere student, tueri sine profunda Physices & Geometriae notitia nullus possit Theologus. Quibus enim ratiociniis mirum illud Solare deliquium, quod suffixo cruci Christo non sine omnium spectatorum stupore & horrore contigit, verum fuisse miraculum, adeoque ad dignitatem Servatoris nostri, dicam an innocentiam, demonstrandam valere plurimum, huic hominum generi persuadebit? nullis certe, nisi quae Physica suppeditat, argumentis; Ex hac enim scientia unice probare poterit, necessario ex naturae legibus, quas adorandus mun-

di conditor jam inde a seculorum initio pro liberrima voluntate firmas certasque posuit, sequi, nullam, quam dicunt, Solis Eclipsin nisi circa Novilunium spectari posse; neque enim argentea Phoebe aureos Solis radios, quibus telluris ceteroquin bearet incolas, intercipere poterit, nisi inter Solem terramque media sit, quod, ubi nova est, tantum contingit. At vero Christum non Novilunii sed Plenilunii tempore mortem subiisse abunde inter Eruditos & sacris historiis & Mosaicae legis instituto convenit. Non igitur stupendus hic Solis defectus talis fuit, qui ex statuto naturae ordine fluens ante mille annos neque annos tantum, sed, si creatus tum stetit mundus, secula certo calculo computari potuisset, sed qui non nisi ex mero Dei beneplacito deducendus, &, si nonnullos audiamus, e diametro naturae legibus repugnans miraculose Servatoris Deitatem confirmat & confir-

firmabit aeternum: Quod si per tenebras, quas in miro hoc Solari deliquio telluri offusas fuisse Sacrae narrant historiae, omnimodam luminis privationem intelligere liceat, solidissimum inde, quo verum hoc miraculum fuisse evincat, Physicus hauriet argumentum; docet enim ex fidissimis observationibus Philosophia naturalis, totalem, quod ajunt, Solis Eclipsin quatuor minuta excedere rarissime, ita ut, ubi haec effluxere, luminosi, qui modo tegebatur totus, disci pars denuo apparere incipiat, adeoque si quod appareat deliquium, quo Sol majori tempore intervallo absconditus latet, non causis naturalibus adscribendum, sed pro miraculo habendum esse. Quae si vera sunt, uti sunt verissima, quis neget Solarem hunc defectum, qui ex infallibili Lucae testimonio per tres horas conspiciebatur, pro summo miraculo salutandum esse; quae & inde eluces-

I cent

cent clarius, quod in hac Eclipsi tota tellus tenebris involuta dicatur, cum in naturali parva tantummodo ejus portio luce careat. Nihil jam dicam de aeneo Salomonis mari, de quo tot controversias inter se movere eruditi, quae nisi a Geometris decidi poterunt nunquam. Agnoscitis itaque, A. A., quam a vero tramite deflectant plerique sacrorum rituum Epopae, qui primam Philosophiam utcunque excolentes naturalem negligunt, ejusque studium adeo inutile censent, ut eidem vacare hominis esse pronuncient otio suo abutentis; sed, si qua augurio fides, ferro cum Phrygibus sapient, factamque pretiosissimi temporis jacturam tristes deinde deplorabunt.

At quamvis Philosophiae incumbere necesse habeat Theologus, si vere Theologus vocari gestiat, nihil tamen nobis cum hoc, quidquid est, studiorum genere, Juridicos occinentes audio;

dio; Vah! quam toto aberratis coelo, si haec vobis sedeat sententia! Igiturne Juris Consulti & periti dici poteritis, si naturae ignoretis jura? Igiturne Justitiam & aequitatem coletis & exercebitis, si quid aequum Justumque sit vos fugiat? At unica id docet, Philosophiae basis, Ratio; Ad hanc enim & hanc quidem solam expendendum, quid conveniat, aut quid deceat minus; docet enim haec, quae norma boni, quis limes honesti. Sed quid in efferenda naturalis studii necessitate moror? cum nullus vestrum sit, qui non penitus se convictum fateri cogatur, postquam NATURAM UNAM JURIS ET VIRTUTIS NORMAM modo solidissime demonstraverit Clarissimus, quem vobis totique Academiae gratulor, WIELINGIUS.

Quantum vero in Mechanica usum praebeat Physica, vel inde colligas, quod post fervide excultum hoc stu-

dium Mechanicae artes ad summum  
adscenderint fastigium. Si ex multis,  
quae valida occurrunt, exemplis unum,  
quod vel pertinacissime adversanti os  
obturet, desideretis, A. A. videte  
quam solide Physicis, & Mathematicis  
scientiis conditus artem illam, quae  
horologia construere, & ad Solarem  
motum aptare docet, perfecit im-  
mortale Hagae decus HUGENIUS,  
quem ubi nomino, vix hominem, sed  
divini ingenii virum, sed eruditionis  
subtilitatisque monstrum memorari cre-  
dite. Jaëtet suos Physicos & Geome-  
tras fecunda sapientiae altrix Gallia;  
superbiat suis, quibus superbit merito,  
vicina Anglia; ostendet suos fertilis e-  
ruditorum mater Germania! At ne  
unum hoc Batavis, Boeotum cetero-  
quin crasso sub aere natis, invideant,  
quod suam vervecum, si Displacet, pa-  
triam virum eduxisse glorientur, cui  
vix parem videre secula, vix vide-  
bunt



bunt unquam, totusque dudum ad-  
 surrexit, & adsurgit adhuc dum Phy-  
 sicorum, Geometrarum & Astrono-  
 morum chorus; sed quid loquor? ta-  
 cere praestat, quam pauca dicendo &  
 incondito sermone nunquam morituras  
 Tanti Viri laudes deterere, &, dum  
 amplificare conor, re ipsa extenuare.  
 Quis vero nescit, quam sibi aeternum  
 devinctos reddiderit Mechanicos HU-  
 GENIUS noster? Hic enim, ut a  
 primordiis rem repetam, mire perspi-  
 cax duo & illa quidem maxima, qui-  
 bus inventa a Lynceo illo GALILAEO  
 Siderum observandorum obnoxia erat  
 Methodus, incommoda felicissime cor-  
 rexit: hoc enim docente primum e tenui  
 catenula suspensum pondus impulsus  
 fuit continuo, singulaeque vibrationes  
 numeratae, e quibus tandem aequalia  
 temporis momenta colligerentur; quae  
 quidem agendi ratio uti difficilis ad-  
 modum erat, ita haud parvum parere

K

sole-

solebat taedium, eo maxime nomine, quod ad pendulimotum continuandum adstantis opera requirebatur, & vix ferenda hercle patientia totas noctes vacare cogeretur nonnemo, qui singulos penduli itus reditusque, praetermisso nullo, annotaret. Quod animadvertens HUGENIUS subtilissimam certe machinam, oscillatorium nempe, quod vocant, horologium construi curavit, quae & summis his difficultatibus esset exempta, & pluribus se commendaret commodis, quae singulatim recensere minime hujus loci esse existimo, praesertim cum nulli, qui vel primis, quod ajunt, labris Astronomiam tetigit, ignota esse possint. Quod sane opus quantae fuerit molis simul & momenti vel inde discatis, quod plurimorum invidiam, quae claros velut umbra viros sectari amat, effugere non potuerit Heros noster plurimos cum in patria nostra tum in exteris regionibus

gionibus expertus, qui eo audaciae procefferunt, ut palmam hanc nobilem certe, atque assidua partam industria Belgis, lepidis, at sine cerebro scilicet, capitibus praeripere, sibi que Hugeniani inventi gloriam arroganter vindicare non dubitaverint. Verum enim vero, uti nullius rei initia perfecta sunt, ita & haec machina non contemnendis laborabat defectibus, quippe quae justam temporis aequalitatem non satis indicabat; ea quidem de causa, quod vibrationes inaequales non aequae diuturnae forent, quod, si quis ejus foret usus, omnino erat necessarium; At non haeret CHRISTIANUS noster, qui vel ad Gordium nodum solvendum natus hic certe, si ullibi, virum se praestitit: Pro summa enim, qua pollebat, sagacitate memorabile illud omniumque encomiis nunquam non celebrandum penduli genus detexit, quod inter duas Cycloidalis li-

neae portiones suspensum iisque continuo applicitum curvam describeret, cujus ea natura esset, ut, si corpus per hanc vibraret, excursus omnes sive latiores forent sive angustiores eodem absolverentur tempore, neque ulla inter eorum durationes intercederet differentia. Hoccine vero A. A. H. H. ad quos, quotquot hujus scientiae gnari estis, ceu aequos rerum aestimatores provocare non vereor, hoccine unquam praestare potuisset ZULICHEMIUS, nisi Physicus, nisi Geometra & insignis quidem Physicus, consummatusque fuisset Geometra? Igiturne vel per millesimam consequentiam hujus machinae usum suspicatus fuisset, nisi Matheseos tam Analyticae quam Syntheticae ope perspectum habuisset, evolutam, ut vocant, Cycloidis ipsam esse Cycloidem, simulque ipsi ex Philosophia naturali innotuisset, eam esse evolutae hujus proprietatem, ut, quocun-

cunque in puncto corpus ponatur, vis, quacum pondere suo juxta curvam fertur, proportionalis fit portioni curvae inter hoc & infimum curvae punctum interceptae, adeo ut, a quacunque altitudine corpora devolvi inceperint, eodem semper tempore ad punctum infimum perventura sint, a quo ubi acquisita velocitate adscendunt, eodem iterum tempore ad aequales, a quibus cecidere, altitudines pertingant; quae cum semper fiant, quamdiu motus corpori impressus servatur, necesse est, in cycloide moti corporis oscillationes majores minoresve ejusdem esse durationis. En! nobile illud *εὐρημα* Hugenario nomine dignissimum, quo an ullum, cujus usus latius pateat, inveniri possit uti dubitamus, ita ejus originem unice Physices & Geometriae principiis deberi sumus persuasissimi.

Quid de Astronomia censebimus?

L

quae

quae certe , praeterquam quod Solis  
 planetarumque cursus, varia, quae in  
 coelis haud raro conspiciuntur, Phaenomena , coelestium corporum exter-  
 nam faciem , miras quandoque muta-  
 tiones , & quae hujus generis plura  
 sunt , observando colligens primariam  
 naturalis Philosophiae partem consti-  
 tuit , talia ponit principia, talibusque  
 indiget instrumentis , quae in Physica  
 fundata sunt. Quid ? nonne Telesco-  
 pium, quo ne per momentum quidem  
 carere potest Astronomus, ex legibus  
 Dioptrices construi debet ? unquamne  
 vera planetarum loca, latitudines, al-  
 titudines , declinationesque rite dete-  
 gere poteris, nisi scias, ea radios  
 quoscunque proprietate esse praeditos,  
 ut e vacuo , vel, si forte velis, tenu-  
 issimo certe medio , quale dubio pro-  
 cul coelum continet, in Atmosphae-  
 ram ingressi non recta via pergant, sed  
 ob mutatam continuo ejus densitatem  
 inde

inde deviantes curvam quandam (quae cujus generis sit haëtenus certo satis determinatum non videtur) describant, quo fit, ut altiori in loco nobis conspiciantur, quam vere existunt, unde & ratio peti debet, cur vespertino tempore Sol supra horizontem adhuc appareat, cum jam occultus sub eo lateat; matutino autem ante verum supra horizontem ortum jam ortus videatur; quae omnia, utut paradoxa, vera tamen, ex refractionis regulis, quas explicare Physici est, & deduci debent & deducuntur facile.

Nihil nunc de Arte Nautica, quae miras magnetis proprietates: Nihil de Geographia, quae sphaericam telluris figuram; quae locorum longitudinem ex Solaribus, Lunaribus, & satellitum Jovialium Eclipsibus, adeoque ex Physicis & Astronomicis fundamentis demonstrari jubet; Nihil de Chronologia, quae, quicquid de horis earum-

que differentia, dierum inaequalitate, calendariis, aeris, cyclis, periodis habet, e Philosophia naturali hausit; Nihil denique de Historico studio dicam; quod cum Geographiam & Chronologiam, ceu duos, quibus instructum sit oportet, oculos desideret, necessario quoque Physicam excoli exigit. Quae quidem omnia strictim persequeretur, nisi magis pondere quam argumentorum numero certare proposuissem.

Percipitis itaque, nisi mea me fallat opinio, A. A. H. H. quo ego jure, quave injuria tantum non indissolubile, quo cum reliquis artibus Philosophia nectitur, vinculum pronunciaverim; quo quidem licet arctissime devinctam omnibus demonstraverim, nulli tamen adstricta est firmitus quam Medicinae, praestantissimae illi arti, cujus ab ipsis olim, si aequos rerum arbitros veteres audire velimus;



limus, Diis inventae dignitatem necessitatemque venerabundi exosculantur, quotquot amissas aliquando sive labefactatas vires ejus ope sibi redditas fuisse merito laetantur; rident vero & ceu inutilem explodunt plurimi, qui integra semper gavisi sanitate efficaciam ejus experiri uti necesse habuere nunquam, ita, quamprimum lecto affixi misere decumbent, illico se suasque, quas temere conceperant nimis, damnantur opiniones. Haec sane artium nobilissima tam firmo foedere Philosophiae conjungitur, ut adfirmare non verear, nullas dari scientias, quae sanctam adeo inter se colunt amicitiam, mutuamque sibi praestant operam: Minus ergo apte nescio quis statuebat, ubi incipit Medicus, ibi Physicum desinere; verius certe multo & potiori longe jure, ubi incipit Medicus, ibi Physicum pergere dixisset: Medicinam enim nihil esse aliud quam humani cor-

M

poris

poris Physicam tam evidens opinor ,  
 ut evidentius nihil. At vero dum sum-  
 mam in Medicina Physices utilitatem  
 audax urgeo , nolim putetis , A. A.  
 adeo me in fulgidissima hodierni seculi  
 luce caecutire , ut totam quantam ex  
 primis rerum Physicarum elementis  
 hauriendam esse Medicinam , morbi-  
 que causas ex intimis , at simul obscu-  
 ris , Physicae penetralibus investigan-  
 das , atque ex certa particularum dis-  
 positione , pororum figura , materia  
 aetherea tam naturali quam peregrina ,  
 quaeque hujus farraginis plura sunt  
 commenta , dicam an figmenta , expli-  
 candas esse censeam : Nihil certe minus ;  
 Haec enim agendi ratio quam frivola  
 fit & absurda jam olim evicere splen-  
 dida patriae Academiae lumina PIT-  
 CARNIUS & VOLDERUS : At u-  
 num hoc volo ; ad explicandas rite  
 corporis functiones , imo & applican-  
 da adversus morbos remedia multum  
 con-

conducere *Physicam*, non illam, quae dubia, incerta, ficta, imo & penitus falsa principia garrula crepat, sed quae Geometricis demonstrationibus, certisque ac repetitis rerum experimentis innixa certa praebet & tuta, quibus Medicus insistat, fundamenta. Tantam vero ex causae, quam ago, bonitate cepi fiduciam, ut jam inde a principio exultare, & de certa, quam dubio procul penes me fore auguror, victoria mihi gratulari audax non erubescam: Vos ipsos A. A. testes invocare liceat, quos, ut aequi iudices, quid valeant argumenta, quam ponderosa sint ratiocinia, expendere dignemini, enixe obsecro.

Si illae scientiae, quarum cognitione tantum abest ut Medicus carere possit, ut absque iis cum in vitae sanitatisque causis certo indagandis, tum in morbis arcendis & profligandis nihilum quidem proficere possit, quas-

M 2

que

que si perspectas habeat splendido dogmatici titulo superbire, sin ignorat, non nisi verbosus circulator vocari mereatur; si, inquam, illae scientiae multa e Physicis scitu necessaria supponant, vel, quod stringit fortius, indivulsaе Physices partes sint, ita quidem, ut, si has sustuleris, mancum fiat atque mutilum rerum causarumque naturalium studium, quis, quaeso, est, qui non luce meridiana clarius videat, Philosophiae exercitium Medicinam facturo adeo esse utile, quam quod maxime? Neque haec gratis a me adsumi facile judicabunt illi, quibus mecum has disciplinas penitus introspicere volupe fuerit: Agite enim & contemplamini totius Medicinae tam quae Theoretica, quam quae Practica vocari vulgo consuevit, basin Anatomicen, quae certe velut atrium est, quod ingredi coguntur, quotquot in intimos ejus recessus penetrare satagunt.

Estne

Estne vero ulla ars, cui tantum, quantum huic, cum rerum causarumque naturalium cognitione intercedit commercium? Ego sane, ut libere, quod sentio, eloquar, novi nullam. Est enim Anatome Philosopho naturali adeo necessaria, ut, nisi hanc sedulo excoluerit, veri Physici nomine indignum se reddat, & primariam naturae notitiam sibi deesse fateatur, necesse sit. Igiturne ille, qui totius Macrocosmi fabricam investigare, intelligere, exponere, cunctaque, quae in eo longa serie occurrunt, phaenomena, quantum finito ingenio adsequi datur, explicare, atque ex pulcherrimo ejus ordine, structura, proportionem, perfectissimum, quo haec omnia reguntur, numen demonstrare studet, igiturne, inquam, ille principem ejus partem, humanum corpus, quod, licet parvae adeo molis, tot tantaque sapientissimi Creatoris, quot quantaque ne univer-

N

sus

sus quidem terrarum orbis, complectitur indicia, accuratius perscrutari, & in vëras motuum, quos edit, causas inquirere negligeret? Hoc sane adeo a ratione alienum esse, quam quod alienissimum, quis est, qui non perspicit? Infinitis ergo defectibus absque Anatomiae notitia Philosophiae studium laborat necessario. Neque haec unice de illa dissectione, quam uti in cadaveribus patitur facile, ita in vivis vel maxime scelestorum & jam jam morte puniendorum corporibus instituere humana vetat misericordia, nec praeter crudelem HEROPHILUM aut immanem ERASISTRATUM mortalium posset ullus, at imprimis de comparata, quam vocant, Anatome intellecta volo: Illa enim fabricam corporis quidem docet, eamque exacte satis, at praeter fabricam docet nihil; Haec vero, quae viva incidit animalia, & abscondita ceterum oculis nude exponit,

nit, tantae est utilitatis, ut non possimus, quin obstupescamus, quotiescunque succurrit, quantum post strenue artem hanc exercitam ad nobile Physices & Medicinae studium decoris accesserit, atque emolumentum: Postquam enim ex iis, quae in brutis obtinere frequens docuerat observatio, analogice ad humanum corpus ratiocinari coepere Physici, quam plana, quae latitarat semper & ad hunc usque diem certo latitasset, infinitorum phaenomenorum ratio reddi potuit? quam innumeri feliciter emendati sunt errores, quos his experimentis destituti commiserant Physiologi? Vel unum A. A. videte CARTESIUM, qui certe in corporis fabrica, ortu, motuumque causis tradendis adeo hallucinatus est, adeo turpiter deceptus, ut, si Physicos, quos de homine conscripsit vir ceteroquin maximus, & quod miror, subtilissimus Geometra,

commentarios evolveris, in ipso CARTESIO CARTESIUM desideres.

Quid de Chemia dicam? cujus ope specialis Physica ita promota est & elevata, ut nulla demum arte magis: dum enim mire composita dividere, soluta coagulare, coagulata resolvere, haerentia praecipitare, quietis frigidisque liquoribus summum fervorem motumque, dicto citius, miraculi instar, conciliare novit, ita abditas occultasque naturae vias referat, ita arcana ejus recludit, ut, quae spissa olim obvoluta caligine, & plusquam Cimmeriis immersa latebant tenebris, clara nunc in luce tantae artis auxilio locata fulgeant. Cui enim, ut ea tantum enarrem, quae Medicinam propius spectant, humani sanguinis natura, lac, serum, eique analogum ovi albumen ita ad amussim innotuisset, nisi ex Chemicis experimentis sapere daretur? Non miramur ergo summos Physicos indefessam quoque in



in his navare solitos fuisse operam; quod vel unus suo exemplo confirmet BOYLEUS.

Si vero illam Medicinæ partem, e qua ceu viva scaturigine emanat, quidquid in firmanda sanitate morbisque debellandis conducere potest, Oeconomiam animalem intueri libuerit, facile eo nos adduci patiemur, ut fateamur, nullam esse disciplinam, quae amice adeo cum Philosophia naturali conspiraret, operamque ejus tam sollicitè expetat. Si per singulas ejus partes excurrere, sociumque earum, & plus certe quam socium cum Physica foedus demonstrare liceret, quam immensus, in quo exultare posset Oratio, pateret campus! Nullam certe humani corporis actionem juxta artis leges exponi posse, nisi ab iis, qui Philosophicis veritatibus & experimentis tincti, nec leviter sane tincti sunt, nullo negotio probarem. At superstitis temporis penuria

nuria nos in angustias compellit, & pauca quidem jubet, sed ea tamen, quae ad rem maxime faciunt, delibare capita. Non jam, A. A. ex analogia objecti, quod contemplatur tam Physiologia, quam Physica argumenta pro summa harum scientiarum necessitudine desumam; Natura scilicet est, quam considerandam habet utraque; haec quidem Macrocosmi, Microcosmi vero illa; Vultisne exempla, quae ad reddendas functionum animalium causas sine naturali Philosophia praeclusam esse ostendant viam? Agite, videamus vel illam, quae occurrit prima. Qua enim ratione quispiam ad ingerendum vitae sanitatique producendis necessarium alimentum os aperiri posse demonstrabit, nisi Physice doctus fuerit? Ex Mechanicis enim experimentis, Physicisque ratiociniis trochleae actionem usumque ut intelligat, requiritur: Quid enim? censes-

ne

ne unquam digastricum musculum inferiorem ab immota superiori abducere posse maxillam, nisi per stilo-hyoideum, velut supra throchleam funis ductarius, transiret, ejusque ope a naturali directione deflexus ad illam, qua os referari potest, determinaretur; vel, si hoc non contingat, uti per mirros variosque naturae lusus saepiuscule non fieri plus semel vidimus, ossi hyoidei saltem adfixus, eodem fere modo ac per stylohyoideum transmissus operari cogeretur? Necessariam esculentorum comminutionem nonne e Phisicis Mechanicisque fundamentis exponendam censes? dum enim cuneos perfectos incisorii dentes referunt, nonne & proprietates & effecta cunei Physiologo innotescant necesse est? Quis, obsecro, gustus (neque enim de internis sensibus loquar) quis olfactus, quis denique tactus Phoenomena, nisi in Phisicis fuerit versatissimus,

comprehendet? At stupendas oculi  
 aurisque functiones, nisi qui subactum  
 naturali Philosophia habuerit ingenium,  
 extricabit nullus: si quis enim proble-  
 ma, quod visus rationem reddere ju-  
 bet, solvere tentaret, nonne tota ipsi  
 Optice & Dioptrice perspectae requi-  
 rerentur, unde data, quibus quae-  
 stioni satisfaciat, mutua sumere posset?  
 Nonne principes radiorum solarium  
 proprietates, quibus e rariori in den-  
 sius medium ingressi a recta via refrin-  
 guntur, atque ad perpendicularum ac-  
 cedunt, cognitae ponuntur? Quid?  
 possetne ad interrogata respondere, si  
 mira convexarum lentium ipsi laterent  
 effecta? Accedit, quod non Opticen  
 tantum, non Dioptricen, sed pulcher-  
 rimum illud Physices argumentum,  
 quod solidissime pertractavit seculi no-  
 stri prodigium Ill. NEWTONUS, co-  
 lorum scilicet historiam exactissime no-  
 visse debeat. Cur enim internis oculi

par-

partibus nigredinem quampiam obdu-  
ctam putemus? nullam sane aliam ob-  
causam, nisi ut radii oblique lentem  
crystallinam praetergressi vel & ab ea  
remissi, atque in opacas has membra-  
nas illapsi neutiquam reflectantur, quo  
fieret, ut confusam delinearent ima-  
ginem, sed ut obfuscentur quasi &  
irretiantur, quod colorem nigrum,  
si forte is color dici mereatur, uni-  
ce praestare e Philosophia natura-  
li abunde constat. Quis auditum, ni-  
si aeris naturam, motum, elasticita-  
tem & miram praesertim, quam Geo-  
metricis demonstrationibus firmavit  
Anglus Philosophus, undulationem ad-  
sequatur? Quis sine horum plero-  
rumque notitia & ea quidem satis  
recondita respirationem? Quis cordis,  
vitae nostrae promi condi, effectum,  
sanguinis scilicet humorumque conti-  
nuam, nec, dum vita manet, ullo  
modo interruptam circulationem aliunde

P

de

de quam ex hydraulicis legibus explicabit? quod e vera secretionis animalis tradendae methodo evidens est. Quis denique, ut uno, quod instar omnium sit, exemplo rem conficiam, quis Physices ignarus vel tantillum, quod probabile est, de stupendo musculorum motu, ineffabili vi, atque incredibili potentia in medium proferre poterit, quae tamen implicita hercle & difficillima Phaenomena e Physicis, Geometricis, Mechanicisque fundamentis, & ex iis quidem solis enodanda esse insignis ille Physiologorum Coryphaeus BORELLI luculentissime, ut opinor, evicit.

Quantum vero in facienda Medicina commodi praestet rerum causarumque naturalium studium, nisi talpa caecior sit, perspicit quilibet. Est enim Medico Practico Theoriae cognitio adeo necessaria, ut vel una haec Dogmaticum ab Empirico, rationalem  
ab

ab irrationali distinguat. Quo vero pacto, ne ab eodem, quod proposuimus modo, oculi exemplo recedamus, myopas curabit Medicus, quo modo presbytas? nisi noverit, hos tali oculorum vitio laborare, ut non nisi post retinam demum concursuri sint radii, cum in illis focus jam ante tunicam haereat, adeoque in utroque casu confusam & perplexam formari, quae distincta & expedita esse debebat, objecti imaginem, unde facile colliget tale myopibus auxilium convenire, quod radios divergere, presbytis autem, quod eosdem convergere facit, quorum prius in concavo, posterius in convexo vitro situm esse e Physicis discet. Miri, quem cucurbitulae tam scarificatae quam ventosae a Clinicis nonnunquam applicandae sortiuntur, effectus causam nonne ignorata aeris elasticitate ignorari necesse est? fugata enim dudum est inanis vacui fuga. Taceo, demor-

forum a tarantulis , teterrimo illo Apularum aranearum genere , imo & nonnullorum Melancholicorum curationem non nisi per Physica instrumenta , quibus certa ratione determinati soni formantur , absolvi posse. Quid ? nonne & suos in praxi usus habet moralis Philosophia ? dum enim affectus e mira mentis corporisque conjunctione oriundi mire corporis statum motusque immutare possunt , multis saepe & dirissimis quidem morbis occasionem praebent , quos justa & composita oratione , sedataque animi turbulentia feliciter longe avertere poterit Medicus , quam si magna vel exquisitissimorum pharmacorum mole aegrum obruisset.

Quod si ex auctoritate magnorum & sapientissimorum Virorum argumenta depromere liceat , & quidni liceret A. A. ? nemo erit , cui vel ullus de inviolabili Physices cum Medicina foedere



dere restabit scrupulus. Quis enim nescit, ut veteres taceam, e quibus HIPPOCRATES, quo auspice Medicina fundata est dogmatica, alique tanti in arte Dictatoris castra secuti recenserī possent, quis, inquam, nescit, e recentioribus illos, qui summum inter Medicos nomen adepti fuerunt, summa quoque extitisse Physices & Geometriae lumina? Quis ignorat REDOS, MALPIGHIOS, BELLINOS, BORELLOS, KEILIOS, ALBINOS, BOERHAVIOS, &, quem non nisi honorificentissime appello, Magnificum Academiae nostrae Rectorem, MUYSIUM, pluresque alios Viros mehercle eruditissimos. Quae certe, quot & quanta! nomina adeo plene confirmant, arctissimis cognitionis vinculis implicari Physicam & Medicinam, ut reliquis, quae adtuli, argumentis sine ullo causae meae detrimento supersedere facile potuissē.

Q

Eant

Eant nunc nescio qui Semiempirici omnemque Philosophiae cultum e Medicina exulare jubentes *maximos Medicos*, ut cum CELSO loquar, *naturae studiosos esse, si ratiocinatio hos faceret; nunc his verba superesse, deesse medendi scientiam* imperite calumnientur. Eant nunc, atque sola freti experientia (cui de sua dignitate nihil detractum volo, at rationi & Philosophiae jungendam fortiter urgeo) rideant omnes causarum investigatores. Nos certe *rerum naturae contemplationem, quamvis sola Medicum non faciat, aptiorem tamen Medicinae reddere cum eodem LATINO HIPPOCRATE* adfirmare non veremur; imo *sine ea truncam fore & debilem medendi artem*, nullum, nisi qui omnem pudorem decoxerit, negaturum esse sumus persuasissimi.

Sed vela Orationis contrahere, finemque dicendi facere vestra, **ILLUSTRISSIMI** atque **AMPLISSIMI**

MI

MI CURATORES, ad quos me converto, jubet praesentia. Quotiescunque singulare illud, quod in me nihil tale cogitantem, nihil prensantem, contulistis, beneficium attenta mente perpendo; Quotiescunque vestram, qua me de meliori nota Illustribus ac Praepotentibus Ordinum Frisiae Delegatis Novemviris commendare generoso facinore voluistis, benevolentiam intueor, toties sane ita me vobis obstrictum agnosco, ut nulla demum ratione tantis meritis respondere me posse facile videam. Qua ego mente, quibus verbis summum, quo me complexi estis, praedicabo favorem? Vos enim adeo benevole de me studiisque meis judicastis, ut e privatis parietibus, intra quos latitantem dulcis saturabat quies, & ab aegrorum lectulis, quibus haud raro adesse fatale hoc, quod viximus & doluimus, jubebat tempus, in publicam hanc bonae mentis palae-

Q 2

stram

stram me juvenem adeo, & vix ac ne vix quidem tanta sperantem evocare, similemque mihi, quo Parens alio quidem in loco, alioque studiorum, agnato tamen maxime & adfini, genere fungitur, & functus fuit olim Avus, honorem offerre non fueritis dedignati. Quae quidem uti mentem haud mediocri laetitia permulcent, miroque voluptatis sensu titillant, ita tamen animum haud parum angunt simul atque suspensum tenent: Est scilicet aliquid tantis Viris, quanti & olim & nuperrime ex hac cathedra docuere, successorem dari: Ego quippe meae tenuitatis conscius meo me pede metiri, & quid humeri valeant, quid ferre recusent, agnoscere didici: Quae dum attentius cogito, vereor sane, ne vos, VIRI AMPLISSIMI, aequam nimis de mea eruditione, quae novi quam sit tantum non nulla, tuleritis sententiam, Virique illi, qui meam qualem-

cunque

cunque apud Vos laudarunt industriam plus justo amicitiae tribuerint, &, si quam in Philosophicis nactus sim, peritiam nimium amplificaverint; imo vix me contineo, quin Spartae huic, quam augendam & ornandam mihi commisit, gerendae minus idoneum me pronunciem, & pronunciarem certo, nisi persuasus essem, adeo erectae Vos esse indolis, VIRI GENEROSISSIMI, ut non eadem a juvene, quae a Viris multo usu atque longa annorum serie exercitatissimis expetatis. Hoc certe titubantem firmat, hoc labentem sustinet. Quamvis autem ad summum vastae illius, quam in Clarissimo decessore RUARDO ANDALA Vobiscum mirata est tota Academia, doctrinae fastigium neutiquam attingere me posse, huc usque saltem abesse quam longissime satis gnarus sim, tamen sic velim existimetis, omni ope atque opera id me acturum esse, ut diligen-

R

ria

tia & adfuitate ne tantillum quidem ipsi cedere necesse habeam: Quod si praestitero, licet arduum magnaeque molis sit negotium, vestram, quam de me benigne concepistis, spem non penitus irritam fore mihi persuadeo, hoc unum sufficere ratus, quo Vos nunquam vestrae de me existimationis poeniteat. Vos modo me ceu clientem, qui vestram fervidissime aucupari gratiam nunquam non conabitur, suscipere, vestroque patrocinio beare pergatis, enixe precor. Quod superest, Deum T. O. M. ardentissimis votis pro perennitate salutis vestrae nuncupatis fatigare nunquam desinam. Vivite igitur, **ILLUSTRISSIMI PROCESSES**, felices diu, atque Patriam, in quam toties e vestra sagacitate & perspicaci prudentia uberrimos fructus redundasse uti laeti recordamur, ita jam jam larga messe redundaturos certi auguramur; Academiam, quae vestris

stris servata , aucta , ornata auspiciis  
caput alte erigit , multoque splendore  
fulget ; Ecclesiam denique , quae in Vo-  
bis , quod spei reliquum est , unice re-  
positum habet , capeffite incolumes.

Ad Vos accedo , CELEBERRIMI  
PROFESSORES , Viri Eruditissimi ,  
quorum fama dudum ultra anni Solis-  
que vias inclaruit. Nihil quidem mihi  
poterat accidere jucundius , quam Vo-  
bis laborum adjungi socium. Gratulor  
fortem meam , qua me publica aucto-  
ritate vestro Ordini adscriptum video.  
Gratulor mihi , neque inter minima  
faventis fortunae munera pono , quod  
me in vestram , nunquam non mihi co-  
lendam , amicitiam recipere dignati  
fueritis ; quod beneficii genus dum  
adamante notabo , & plusquam trabali  
clavo in animo infigam , id imprimis  
operam dabo , ut amicum Vos nactos  
esse fidissimum & Collegam conjun-  
ctissimum re ipsa experiamini : Nihil

ego ducam prius, nihil antiquius, quam vestrum data quavis occasione favorem captare: Quamvis autem Vobis cum annis tum ingenio inprimis atque eruditione longe sim inferior, tamen in id dedita opera incumbam, ut adsiduo de Academia bene merendi conatu secundus sim nemini: Vestram ego doctrinam, reliquasque, quibus excellitis, dotes, ut olim Miltiadis tropaea Themistocles, nocte dieque mihi aequandas, imo, si fieri posset (quid enim tentasse nocebit? neque pro ea, qua estis, aequitate tentanti invidibitis) superandas proponam, quae studia mea foveant, augeant, incitent. Sic quicquid id est, quod conferam, Vobiscum in commune bonum transfundere decrevi; sic Proceribus, sic Vobis, sic erudiendae denique juventuti acceptus esse potero, quae unica est votorum meorum summa.

Vos denique, ORNATISSIMA  
STU-



STUDIOSAE JUVENTUTIS CORONA, devota Phoebæ Musisque capita, mea compellat Oratio! Quæ vero verba me ad Vos facturum conjicitis, nisi illa, quæ animos vestros ad veræ sapientiæ studium excolendum præparent, incitent, incendant. Percepistis, opinor, necessarium illud, quod demonstratum dedimus, Philosophiæ cum reliquis disciplinis connubium: Et dubitetis adhuc eidem nomina vestra subscribere? dubitetis adhuc sacra illa, quæ cultores suos nunquam moritura beant laude, amplecti? Eja agite, EGREGII JUVENES, quos nobilissimæ scientiæ amore captos, ardentes, ferventesque conspicio; Agite, generoso incocta honesto pectora, omnique virium contentione artem excolite, quam si assidui exercueritis, summa Vos manent proemia; sin neglexeritis, certo at sero nimis elapsi frustra temporis, vaticinanti credite,

S

Vos

Vos poenitebit. Neque deterreat gravis, qui hoc studiorum genus comitari solet, labor; Hoc enim, & hoc quidem solo Deos omnia vendere, nec nisi ardua esse quae pulcra, dudum persuasi estis: Ego vero, ut laborem minuam, viamque Vobis sternam facilem, hic adsum: Ego, ut Vobis praeceam, evocatus, lubens laetusque, posthabitis etiam privatis, quorum spes adfulgebat maxima, commodis e paterna ad Vos accurri domo. Vobis, vestrisque desideriis totum me devovere constitui: Si me ducem desideretis, dux ero: Si comitem, comes: Invia naturae, si ejus arcana detegere gestiatis, socii perscrutabimur; nunc in coelos firmioribus tamen, quam olim Icarus, alis instructi evolabimus; nunc Herculeo ausu in profundas telluris abyssos descendemus; nunc Daedaleo more medii haerebimus; Eja agite, & si sequi non recusetis, regiam, quam  
Vobis

Vobis monstrabo, calcate viam: Hanc mihi ductu & auspiciis Clarissimorum praeceptorum ingresso, inoffenso pede, superatis felicissime, quae currentem morari consuevere, obstaculis, Sophiae templum intrare licuit; Eadem si mecum incedere libeat, in idem sacrarium superbum certe atque magnificum Vos inducam. Duas autem accipiemus comites, fidissimas sane & summe necessarias, quibus si destitutus forem, vel ipse certo certius aberrarem, Rationem scilicet atque Experientiam, quas arctissimo copulatas vinculo qui separare voluerit, nae ausis suis excidet, iterque felici cum successu emetiri poterit nunquam: Quamvis autem plerisque vestrum minus tritum ostensurus tramitem, & non iisdem penitus, quibus Clarissimus Decessor solebat, institurus sim vestigiis, quaeso, ne aegre feratis; illa enim Philosophis dudum libertas concessa

est, ut videntes meliora & probantes deteriora sequi non cogantur; imo publice profiteor, si me planiorem atque tutiorem viam quis docuerit, iter meum confestim me abrupturum, cursumque immutaturum esse; Hic candor si Vobis arrideat, eademque apud Vos stet sententia, est, quod mihi Vobisque gratuler; sin, quod abominor, secus, sacris verae Philosophiae initiari poteritis nunquam; exigit enim haec liberos, non ductoribus abjecta servitute mancipatos animos. Macti ergo estote, **PRAESTANTISSIMI JUVENES**, & dum vegetus aetatis flos vernat, solidaeque suo robore vires stant, in illis invigilate studiis, quorum exercitium aeterno Vos honore mactare poterit, neque blandis quidem, at noxiis Sirenium cantibus Vos irretiri, & voraci hac vitiorum Charybdi absorberi patiamini. Quod si caveritis, Parentum & Amicorum, qui Vobis studiisque

vestris

vestris adeo bene consuli desiderant ,  
vota implebitis , atque suo tempore  
Patriae , Ecclesiae , quin & Acade-  
miae inservientes immortalem gloriam ,  
verum diligentiae proemium , conse-  
qui poteritis.

D I X I.



T

VI-

VIRO CLARISSIMO,

Ad magna nato, educto, promotu,

JOHANNI OOSTERDYK  
SCHACHT, Herm. Fil.

A. L. M. Phil. & Med. Doctori, ad  
Philosophiae Professionem in il-  
lustri Frisiorum Academia  
Franekerae Antecessori  
renunciato,

PROPEMPTICON.



Aus & amor juvenum, summi spes  
summa Parentis,

Nunc etiam magnis adnumerande Viris,  
JANE, per insolitos angusto tramite nifus  
Ad Sophiae fontes aulse subire novos.  
Unde salutiferis, Phoebu moderante, medelis  
Ipsa comes rarâ praetulit arte facem.  
Quam bona, quam facilis Dea se Tibi credidit illa,  
Quam certos aditus ad sua sacra dedit!  
Et quam maturo Te nunc dignata favore

Evo-

Evocat ad Clarae pulpita docta Scholae!  
 Scilicet in tanto non passa est lumine Diva  
 Tam pulchras dotes luce carere sua.  
 Leida suos vates jactat, decora ampla Lycei,  
 Quae Batavo caelo sidera summa micant.  
 Hinc aliis succrescit honos & lumina late  
 Spargit amor veri conspiciturque locis.  
 Indignata diu Sophie sua numina rebus  
 Adfigi dubiis invalidisque fuit.  
 Traducique suos doluit sine more ministros,  
 Indigneque reos impietatis agi.  
 Auspicio meliore Tibi nunc lampada tradit,  
 Arque nova cultus vindicat arte suos.  
 Quin age : nec dubita, quamvis probitasque  
 pudorque  
 Te tenet, & manes sollicitare vetat,  
 Vera tamen falsis evolvere nomina caussis,  
 Et famam meritis reddere, JANE, Viris.  
 Quid prohibet Sophiae causam defendere justo  
 Praesidio, & doctas explicuisse vices?  
 Et quorum nulli temeraria lingua pepercit,  
 Illis quae ratio parcere tanta vetat?  
 JANE, novos aditus, speciosa ambage relicta,  
 Ad Sophiae recto tramite pande domum.  
 Neve magistrorum veterum Te terreat usus,

Neve supercilio fallat imago gravi.  
 Nec sibi quas fingit ratio male sedula caussas,  
 Ipsa licet claros luserit ante Viros.  
 Sed qua cura vigil prudenti indagine, tuto  
 Circuitu, & longis usibus acta probat.  
 Perge per abstrusos Naturae arcana recessus  
 Vestigare, Duces qua docuere viam.  
 Jam satis incerto & fragili tibicine fluxi  
 Arbitrii Sophiae templa stetero Deae.  
 Et, quasi turpe foret quid nescivisse fateri,  
 Saepe duces vanis imposuere strophis.  
 Te meliora boni & veri docuere Magistri,  
 Quis nihil in toto clarius orbe niter.  
 His ducibus spatiosa poli convexa tueri,  
 Nocturnaque faces sede notare datum est.  
 Hinc maris & terrae tractus, perque ima vagatus  
 Cuncta vides certa lege tenere modum.  
 Tum caussas, motus rerumque exordia prima  
 Librat ad exactae dextera lancis opem.  
 Aërias moles, viresque, volubile pondus  
 Et varios lusus machina justa notat.  
 Plurima ad Auctorem referens nescire fatetur  
 Haec ratio, stabili progrediturque pede.  
 Quaeque scit, assiduus inconcussisque teneri  
 Legibus, & nulli post dubitanda docet.

Haec



Haec Tibi, JANE, novae jam sunt tradenda  
juventae,

Hanc Te Diva operam, quam dedit ipsa, rogat.  
Illa licet Medicae tantum praeluserit arti,

Et fuerit Phoebæ prævia digna comes,  
Diva sibi primos tamen hinc maturat honores,

Inque suas laudes præmia vestra parat.  
Cultoremque etiam non amissurus Apollo,

Auctorem famæ se volet esse tuæ.  
Non etenim tantas studio Te finxit ad artes,

Has ut privatis usibus esse finat.  
Te successorem GENITOR, quem suspicit  
Orbis,

Qua valet, & miseris subvenit arte, cupit.  
Te longus studii cultus, Te laudis Avitæ

Fama Machaonia poscit in arte sibi.  
Nec frustra magnus raro gavisus alumno  
BOERHAVIUS curas disperiisse velit.

Leida caput coelo dispulsis nubibus infert,  
Et velut illustri sidere stella micat,

Qua miseri tetra morborum turbine prensi  
Convertunt laceras, spe moderante, rates.

Et cui non gemini præcurrens Castoris aegro  
Fulsit apex, lætam progenuitque facem?

Quis vitæ metuens, aut lenta tæbe retentus  
V Non

Non tulit optatam, quamque petebat opem?  
 Huc velut ad sacras passim concurritur arces;  
 Quis sibi praesidium est ponere visa Salus.  
 Has servatrices votiva tabella coronat,  
 Dum celebrat Leidae numina turba frequens.  
 Illa bonis avibus, Phoebo duce, JANE, facultas  
 Subjungat famae dona paterna tuae.  
 Nec, rerum causas dum mens scrutata requirit,  
 Praesentem miseris dextra recuset opem.  
 At Tu, clara novo laetare Franckera, cultu  
 Utque nites, summis hoc decus adde Viris.  
 Et licet ardenti studio contraria virtus  
 Auribus adfundat non satis aequa tuis,  
 Tu linguis animisque fave, melioraque doctis  
 Usibus ad normae disce referre fidem.  
 Ut qua parte alias inter supereminet urbes  
 Laus tua, praeclaris rite probata viris,  
 Hoc Sophiae cultu Batavae Frisiaeque Camoenae  
 Sidera communi nomine summa petant.  
 Et procul invidiâ veri studiosa voluntas  
 Dispergat mentis nubila prisca bonae.  
 Nec credat, nisi quod sibi constans lege severâ  
 Naturae certâ comprobatur usus ope.  
 Sic antiqua novo in laudes Tibi fama redundet  
 Nomine, nec partes deferat aequa suas.  
 Utque

Utque vagis tutos spectantibus aequore portus  
Praelucet laeto lumine certa pharus.

Sic speculae nova fax geminata luce coruscans,  
Deferet ad portus hospita vela tuos.

Tuque novus Doctor, quo Leida superbit  
alumno,

Quemque suo Musae detinuere sinu,  
JANE, per obstantes spinas, quas spargere Livor  
Forte velit, firmo corripe summa gradu.

Aequet AVUM PATREMQUE NEPOS,  
famamque propaget,

Et Batavum Frisio fulgeat axe jubar.

Quid ferat illustrem meritis ad sidera Leidam,  
Discat ab exemplo sedula cura tuo.

I felix, quo fama vocat, quo vota sequuntur,  
Auspicio praeceunt numina certa suo.

Te Patrii plausus comitantur, amica Camoenis  
Gratia, Te Sophiae praemia magna manent.

Quis, HERMANNE PATER, motus sen-  
susque paternos;

Quis, tua qui merito gaudia narret, erit!

Te vegeto, matura tuo dat praemia nato

Et Sophiae vatem Pallas amica vocat.

Augurioque novo certam promittit Apollo,  
Paeoniae, miseris quam feret, artis opem.

Laetamur Tecum , laetantes adjuvat Echo ,  
 Et fausto geminat publica vota sono.  
 JANE, Patris magni merito florentis imago ,  
 Quem feret ad faeculi gloria grande decus ,  
 I dexter meritis , Teque exsere , & incipe nosci,  
 Te tua docta Virûm fama per ora vehet.  
 Et licet indignans rodât sua viscera Livor ,  
 Infere te summis , qui poliere , viris.  
 Quaesitam meritis sic OOSTERDYKIA fa-  
 mam  
 Producat doctâ prole beata domus.

HENR. SNAKENBURG.